



Faglig kontakt under eksamen:

John Tyssedal 73 59 35 20

Stian Lydersen 73 59 35 20

EKSAMEN I FAG SIF5506 STATISTIKK

Tysdag 1. juni 1999

Tid: 09:00–14:00

Hjelpemidler:

Godkjent lommekalkulator, utdelt ordliste, Statistiske tabeller og formler (Tapir forlag).

Oppgave 1

Nokre moglege hendingar ved bygningane til NTNU ved årsskiftet 1999/2000 er følgjande:

E = Tap av elektrisitetsforsyning

V = Tap av forsyning av vatn

F = Tap av fjernvarme

Ei ekspertgruppe har kome fram til følgjande sannsyn for hendingane E og F : $P(E) = 0.05$, $P(F) = 0.05$ og $P(E \cap F) = 0.02$.

- Romtemperaturen i bygningane vil gå ned ved tap av elektrisitetsforsyning eller tap av fjernvarme. Uttrykk denne hendinga, R , ved hjelp av E og F . Kva blir sannsynet for R . Er hendingane E og F uavhengige? Er dei disjunkte? Grunngje svara.
- Gitt at ingen av hendingane E og F skjer, er sannsynet for V lik 0.07. Gitt at minst ei av hendingane E og F skulle skje, er sannsynet for V lik 0.50. Finn sannsynet for hendinga V .

Eventuelle iverksette laboratorieforsøk blir brotne av dersom minst ei av hendingane E , V og F skjer. Kva er sannsynet for at dette skjer?

Oppgave 2

Utrykningspolitiet (UP) vil undersøke kor ofte det skjer grove fartsoverskridingar på innfartsvegane til Oslo. Med ei grov fartsoverskriding er meint køyring i over 130km/t på strekningar der fartsgrensa er 90km/t . Vi skal gå utifrå at talet på slike overskridingar, X , over eit tidsrom på t timar er Poissonfordelt med parameter λt .

- a) Gå utifrå at $\lambda = 0.5$ og la X vere talet på grove fartsoverskridingar i ein periode på 5 timar. Skriv opp sannsynsfordelinga til X . Finn sannsynet for at det skjer ingen grove fartsoverskridingar i denne perioden og sannsynet for at det skjer meir enn to slike. Kva forventning og varians har X ?
- b) Det blir brukt laser til å måle farten på bilane. Dersom den sanne farten på bilane er μ , skal vi gå utifrå at lasermålingane er normalfordelte med forventning μ og standardavvik $\sigma = 1.5\text{km/t}$. Finn sannsynet for at laseren viser meir enn 130km/t for ein bil som køyrer i 129km/t .

Utrykningspolitiet ynskjer å setje ein verdi slik at sannsynet for feilaktig å påstå at ei grov fartsoverskriding har skjedd, når ein måler farten med laser, skal vere mindre enn 0.01. Kva er den minste verdien denne konstanten kan vere?

- c) Eigentlig er dei litt usikre på om $\lambda = 0.5$ og vil skaffe seg eit estimat for denne. Det blei føreteke målingar av grove fartsoverskridingar i 4 forskjellige periodar. Dei to første periodane var på 5 timar. La talet på overskridingar i desse vere X_1 og X_2 . Dei to siste periodane var på 10 timar. La X_3 og X_4 vere talet på overskridingar i desse periodane. Vis at sannsynsmaksimeringsestimatoren for λ basert på X_1, X_2, X_3 og X_4 er gitt ved

$$\hat{\lambda} = \frac{X_1 + X_2 + X_3 + X_4}{30}.$$

Finn forventinga til denne og vis at variansen til $\hat{\lambda}$ er $\lambda/30$.

- d) Dersom variansen i ei Poissonfordeling er større enn 10, vil normalfordelinga vere ei god tilnærming til Poissonfordelinga. Kva fordeling er det rimelig å tru vil vere ei god tilnærming for fordelinga til

$$\frac{\hat{\lambda} - \lambda}{\sqrt{\hat{\lambda}/30}}?$$

Grunngje svaret. Bruk så dataane nedanfor til å finne eit tilnærma 95% konfidensintervall for λ .

t_i	5	5	10	10
x_i	3	4	5	8

- e) Gå i dette punktet utifrå at $\lambda = 0.5$. La T vere tida til ein observerer 1. fartsoverskriding. Utlei fordelinga til T .

Fordelinga til T vil vere den same som fordelinga til tida mellom to fartsoverskridingar. Ein dag UP er på jobb, held dei på til dei har registrert 9 fartsoverskridingar. Finn sannsynet for at det kortaste tidsintervallet mellom to av desse fartsoverskridingane er mindre enn 15 min. Du kan gå utifrå at alle tider mellom fartsoverskridingar er uavhengige.

Oppgave 3

På ein av vegane inn til Trondheim er UP interessert i å måle effekten av ei holdingskampanje der målet var å få folk til å redusere farten på ei bestemt vegstrekning. På ein dag blei farten på 12 bilar målt. Vi skal gå utifrå at desse målingane er uavhengige og normalfordelte variable med forventning μ og standardavvik σ . Dei tolv observerte fartsmålingane er gitt nedanfor.

$$x_i: \quad 75 \quad 61 \quad 85 \quad 65 \quad 69 \quad 82 \quad 70 \quad 67 \quad 62 \quad 93 \quad 77 \quad 74$$

Det oppgis at $\sum_{i=1}^{12} x_i = 880$ og $\sum_{i=1}^{12} (x_i - \bar{x})^2 = 1034.7$.

- a) Forklar kva parameteren μ betyr i denne samanhengen. Skriv opp rimelege estimatorar for μ og σ i denne situasjonen. Kva blir estimata?
- b) Forklar kva som meinast med *type 1 feil* når vi utfører ein hypotesetest.

Frå tidlegare undersøkingar har ein at gjennomsnittsfarten (av veldig mange bilar) var på 77 km/t . Tyder resultata frå desse målingane på at forventa fartsnivå på strekninga er lågare enn 77 km/t ? Formuler spørsmålet som ein hypotesetest, gjennomfør testinga og gje konklusjonen. Bruk 5% signifikansnivå.

I punkt c) kan du gå utifrå at $\sigma = 10 \text{ km/t}$.

- c) Forklar kva vi meiner med *type 2 feil* og kva som er samanhengen mellom denne og *styrken* til ein test. Gå utifrå at forventa fart til bilane er gått ned til 74 km/t . Finn sannsynet for at vi i testen i b) vil påstå at forventa fart til bilane er blitt lågare enn 77 km/t .

Finn deretter ut kor mange bilar vi må måle farten til for å få ein test som har styrke minst 0.90 når forventa fart $\mu = 74 \text{ km/t}$. Signifikansnivået skal framleis vere 5%.